

B. N. C.  
FIRENZE  
1146  
15



1146.15

ORATIO  
DE LAUDIBVS  
SS. MARTYRV M  
ALEXANDRI, ATQ; VINCENTII  
Vrbis Bergomi Patronorum.

*HABITA BERGOMI IN ECCLESIA S. MARIAE,  
dum S. Alexandri feria agerentur.*

IOANNE IOANNALIO MONACHO VALLIMBROSANO  
Regente in Monasterio S. Lanfranchi auctore dicente.

*Eorum permissione obtenta, quorum iniussu nemo imprimis impud.*



Bergomi, Apud Cominum Venturam,  
M. D. LXXXVIII.



ORATIO  
DE LA VDIVAS

SS. MARTYRVM

ALEXANDRI, ALO. VINCENTII

VIRI BURGUNDI

WALTERS REFORMATION SOCIETY, 2, 10, 12

JOHN H. JOHNSON, 2, 10, 12

JOHN H. JOHNSON, 2, 10, 12



W. D. LXXXVII  
Ergo, Aprilis Continui Veniamus



PERILLVSTRI AC  
REVER. HIERONYMO

RAGAZZONO

VRBIS BERGOMI EPISCOPO  
*Vigilantissimo, nec non Comitibus, & Equi-  
tis insignibus Ornatisimo.*

IOANNES IOANNALIVS  
Monachus Vallimbrosanus, & studij  
Sancti Lanfranchi Moderator  
Fœlicitatem.



Q[uod] Amplitudini Tue (Præsul  
Reuerendisime) tanquam mor-  
tali Numini hoc (quamquam  
exile) ingenij mei munusculum  
duxerim offerendum, effecerunt  
sapientissima Laconum decre-  
ta, quibus illi bene, prudenterq; instituerunt.

vilibus rebus sacrificemus, ne si minus frugaliter  
sacrificetur, deficiat nos aliquando, quo Numen  
honoretur. Id enim cum ipse mecum animaduer-  
terem, facile adductus sum, ut hanc, qualis qualis  
sit, Orationem tuo nomini consecrarem. Cui nanq;  
decantata SS. Alexandri, atq; Vincentij laudes  
aptius inscribi potuere, quàm tibi, qui ita illorū gesta  
sequeris, ut assequaris? Siue enim in D. Ale-  
xandro Christiani militis, & Imperatoris virtu-  
tem; siue in B. Vincentio vigilem Christiani Prae-  
sulis curā; siue in utroq; eximias dotes, uita sanctita-  
tem, dicendi vim, & animi constantiam prae-  
dico: ubiq; Tu mihi occurristi, qui quasi uinum exem-  
plar, et absolutissima tantarum laudum imago, eo-  
rum virtutes mirificè complexus fueris. Quam-  
obrem peropportunè Tuum nomen mea hac Ora-  
tio praeferet; ut quibus minus otij suppetit, quàm ut  
totam Orationem perlegere possint, in eo, tanquam  
in Idea, & totius Orationis argumento, (ni ma-  
lit quispiam) quasi in Indice locupletissimo, egregias  
horum Martyrum virtutes percurrant; imò uerius  
& exactius, et splendidius, quàm in Orationis mea  
decurſu recognoscant. Siquidem Orationis mea ge-  
nus humile, atq; obscurum, virtutum tuarum, &  
fulgentissimis tuorum Insignium Radijs non media-  
cri-

critter illustrabitur. Sunt quoq; alia complures cau-  
 sa, quae me permouerunt, ut hanc Orationem tuo  
 nomini nuncuparem: Quia oratio est De laudibus  
 Patronorum urbis Bergomi, quorum Tu vice,  
 Bergomensis Ecclesia gubernacula substines: Quia  
 Bergomi habitas; quae Ciuitas plus tuo patroci-  
 nio, & tuorum micantium Radiorum splendore collu-  
 cet, quam ullius alterius mortalium claritate:  
 Quia elaborata, editaq; est à me, studij S. Lanfran-  
 chi Regente, & alumno admodum R. P. D. Co-  
 lumbini de Alfiano Monasterij Pasiniani Abba-  
 tis meritisimi; cuius egregia, & singularis erga  
 Amplitudinē tuā obseruantia, et animi deuotio, mi-  
 nimè eget ut mea oratione promoueatur in lucem:  
 Quia admodum R. P. D. Calisti Solarij Astinen-  
 sis Abbatis intuitu, & adhortatione elucubrata  
 est; cuius sanè, atq; adeo totius Cœnobij patro-  
 cinium, mirum est, quàm semper duxeris ad Am-  
 plitudinem tuam pertinere. Feci id tandem, ut ali-  
 quam eximia erga te mea uoluntatis significationem  
 ederem; testatumq; apud omnes relinquerem, fore;  
 ut ego semper sim tibi perquam deditissimus; si tuo  
 optatissimo patrocinio subleuabor. Hec eò dixi, ut  
 omnes intelligant, me non tam animi audacia has  
 elucubratiunculas sub tui nominis umbra inuulgasse,  
 quam



quàm quòd illa tibi deberentur. Deus faustisimo-  
rum, fœlicissimorumq; successuum elargitor, fœli-  
citatem, qua nunc frueris, bonorum omnium, qua  
illam absolvere possunt, accessione locupletet. Ex  
Monasterio S. Lãfranchi. Pridie Calendas Septem-  
bris. Anno decimisexti à Christi Natiuitate seculi  
oçtuagesimo oçtauo.

*Perill. ac Reuerendis. Ampl. tua.*

*Deditis. Filius.*

Ioannes Ioannalius M. V.  
& Lector in Monasterio  
Sancti Lanfranchi.







**C**VM animaduerteterem (viri Bergomates) vos tantâ magnificentia, & tam splendido apparatu, Diui Alexandri Patris, ac Patroni Ciuitatis huius celebritatem ornate: musica, psâlmis, thure, sacrificijs, exactissimo deniq; solemnium ritu, & ceteri moniarum cultu, nec non publica vniuersæ Ciuitatis lætitia venerati: equidem statuebam, nihil fore prætermissum, quod ad tantæ solemnitatis amplitudinem addi posset; si quis pro illius singularibus in hanc urbem promeritis gratiarum nonnihil persoluturus, res præclare ab eo gestas recensere, dicendo illustrare, & grata, iucundaq; virtutis, & beneficiorum commemoratione, tantî Martyris cohonestare festiuitatem aggredideretur. Itaq; (accidentibus præterea multorum studijs, & adhortationibus) ad hoc publicè dicendi onus animum, & cogitationem contuli, ratus fore; vt qui superiore anno, vestra oîum incredibili humanitate ad literatam pugnam admissus, amplissimi huius confessus maiestatem semel vidissem, fierè ad dicendum longè promptior. Nunc autem, cum res aliter euenerit, atq; ego sperabam, & mea hæc imbecilla videndi acies nimio augustissimi conuentus splendore fatiscat: non possum non commoueri animo, atq; mecum sollicitè non timere; ne non tam pietati, quàm audaciæ, non tam obsequio, quàm temeritati tribuatur; quod ego coruscâ, & fulgentem tantæ maiestatis lucem de hoc loco semel expertus, itetû loci huius amplitudinem attingere, iterum in immensum theatri huius splendorem meam oculorum infirmitatè figere haud quaquâ reformidauerim; quin potius ausim ego alienigena de D. Alexandro coram vtris Bergomatibus; quasi alter Phormio coram Annibale de re militari; disserere. Verùm enimverò quid agerem? aut quò me verterem? Ingenij ne, eloquentiæ, atque earû rerum tenuitate, quæ hoibus ad dicendum accedentibus adminiculo esse consueuerunt, me excusarem apud illos, qui tantis precibus id mecum agebant? at illi affirmabant, parem tantis laudibus orationem reperiri non posse: quamobrem quò maioris esset nominis, eò maiore cum nominis dispendio huic periculo se se quisq; orator exponeret. Vestra ne maiestate (Patres) conturbati me, ac deterreri contenderem? at nemo est, in què præclarissima hæc orbis lumina intuentem hic timor cadere nequeat. Commoueri ne me tanta lætissimorû viro- rum frequentia? at illi quærebant de me; quotus quisq; hominum futurus esset, qui tantorum de se vitorum iudicia non extimesceret. Quapropter suscepi tandem hoc religiosissimum onus, laudum tanti Martyris prædicandi, si non vt ille meretur, certè quantum exilis ingenij angusta mediocritas patietur. Videbam sanè nemini paratam esse ignominiam, qui tantas laudes pro dignitate amplecti dicendo non potuisset. Sed in hoc munere obeundo ob eam rem longè magis (vt ingenuè fatear) animum despondeo: quod mihi de D. Alexandri laudibus agere prope- ranti, nefas sit S. Vincentij virtutes silentio pertransire. Haud enim æquû fuerit, vt illos mea oratione disiungam, quos Deus cõiunxit gloriosa palma Martyrij, & insignium præmiorû corona cælesti: quos vestra (viri Ciues) deuotio copulauit: quorum tandem ad vrbis huius parrocinium societate vobis esse fortunatissimâ, non semel experti estis. Ecqua vero ratione fieri po-

terit, vt in breuiffimo temporis fpatio, coram fpectatifsimis viris tanta maieftate præfulgentibus, vnus penè pueri tenuiffima mens, ac frigidi, & ieiuni oratoris exilis vox, duum insignium Martyrum eximias laudes angufta oratione coerceat, ad quorum laudes fingillatim pro dignitate concelebrâdas, nec centum anni, nec centum ora fufficerent? Quis quæfo D. Vincentij merita dicendo vincere; aut D. Alexandri fortiffima gefta facultate oratoria confequi poffit? Quis quæfo numerosam laudum ratarum feriè per breui oratione comprehendat? Quis tantam immenfitatem in hæc anguftiffima vnus horæ fpatia poffit includere? non eft hoc iuuenilis ingenij, atque adeo nec noftræ opis, nec noftræ imbecillitatis. Quid igitur agam? fi ad immenfam laudum tantarum lucem, & inaccessum splendorem propius accedam, eò minus ferre poterò: fi longè afpiciam, perobfcure earum magnitudinem cernam. Sed aggrediar tamen facultate, qua poterò: & fi quò cupio, peruenire non poffum, faltem quantum poffum progrediar, ne cum ipfi tam multa pro cõi noftra omnium falute fortiter paffi fint; nos cõtra, nihil pio muneri tribuiffie criminemur. Nanque fi apud Aegyptios muta quædam, & infenfibilis ftatua aduerfo fole repercuffa loquendi facultatem afſequebat; quid ni ego ſenſus, ac rationis particeps aliquid fati confiſdam; ſi tuæ vberiffimæ gratiæ, ò ſol iuſtitia, placidiſſimis radijs; ſi veſtris, BB. Martyres, fulgentiſſimis luminibus; ſi veſtra demum, viri Clariffimi, plena maieſtate præſentia repercutiar? vos ſupplex inuoco clariffima cæli ſydera, SS. Martyres: vos ſupplex precor clariffima mundi lumina, viri ac præſules nobiliſſimi; ne veſtra illa ineffabilis ſanctitas; ne auguſtiſſimus hic veſter confeſſus; ne veſtra illa præclariffima merita; ne præcelſa loci huius auctoritas; ne veſter lucidiſſimus fulgor; ne veſtra iſthæc heroica magnitudo; ne tãdem hic rerum omnium inſolitus, ac propè diuini luminis ſplendor oculorum aciem hebetet; ſed excitet in me potiùs viuidos quofdã animi motus, quò expeditum mihi ſit tantarum laudum non dicam æquare, at ſaltem afſequi dicendo magnitudinem. Non enim mihi opulenta facundia, vel culto, fucatoq; ſermone cuncta comprehendendi cupido inceſſit. Cum enim de Dei ſeruis acturus ſim, egregia illorum facta ſermonis nuda ſinceritate percurram. Siquidem rerum ab ipsis geſtarum amplitudo ſibi ipſi nititur, non viribus eloquentiæ. Vos Patres ampliffimi, ſi fortè meam orationem, vel in longo laudum decurfu aliquando deficere, vel inter acerbiſſimarum pœnarum procellas fluctuare animaduertetis: quæſo, obteſtorq; vt id partim rebus partim vobis ipsis tribuendum eſſe putetis, quorum maieſtas efficit, vt quamuis iucundiſſima veſtræ præſentia luce recreemur; tamen nec frui quidem illa ſine magno timore poſſimus. & quando me non tam paratum, quàm parere cupientem intelligitis acceſſiſſe; a deſte & oculis, & auribus, & ore, & mente auditores; dormite linguis, excubate animis; & quæ vel incuriæ culpa, vel breuitatis ſtudio prætermittam, vobis ſcum taciti cogitate. Poſſem hic horum Diuinæ Maieſtatis teſtium laudes à celeberrimis tonus orbis partibus Auguſta, & Aegyptia vrbibus exordiri, & inde in Rhetorum morem per nationem, ætatem, cognationem, corporis dotes, educationem, dignitatem, atque fortunas laudationem diducere; ſed quorſum attinet omiſſis fontibus riuiolos conſectari? quorſum in horum Martyrum laudibus illa adnumerem, quæ ipſi dum in hac diſſolu-

bili

bili carne peregrinarentur, nusquā commendanda esse censuerunt? quorsum dum Christianos Martyres laudo, Ethnicorum legibus serui? Qui Christiano, non Ethnico more vixerunt, Christi, non Ethnicorum praconiis sunt extollendi. Itaque de his Martyribus, qui in se Christi fortitudinem effinxerūt, ea tantum recēdere institui; quā sermone potentes, & quā in passione constantes extiterint. Nam & euangelici discipuli de Magistri Iesu Encomijs illa duo potissimū prędicauere: quōd fuit vir potens in opere, & sermone. Verum vt fidicen, aut citharędus, quod est cantaturus pręcinit primū, fides eburneo pedine leuiter percutit, illarum accentus experitur, & sonos percurrit, quos aptos esse intellexerit ad id, quod cupit, benē, canorisq; pulsibus insonandum: ita ego qui hic adsum, nihil fluctuatē sermonis fiduciam, & fortissima horum Martyrum gesta cantaturus, perstringam primū, percurramq; ; imō verius leuiter tangam, & quasi digito commostrabo eas animi virtutes, quibus illi iter sibi, atque aditum intruxerant ad tantam excelsi animi constantiam, & fortitudinem. Dicam igitur quā singulari prudentia, quā incredibili omnibus in rebus temperantia, quanta iustitia, quā stabili fide, ac spe, quanta demum charitate instructi contra valentiores nostrę fidei hostes atrocissima bella fortiter apparauerint, pręsenti animo susceperint, confecerintq; Deo bene propitio felicissimē. Principio itaque scio esse hic neminem, qui nesciat, Christianā religionem sub Diocletiano, & Maximiano Imperatoribus grauissimis persecutionum procellis ac tempestatibus fuisse agitatam diutissimū cum per ipsosmet Imperatores in Italia, tum in Hispania per sęuissimū illorum iudicem Datianum. Nam cum satis falsę superstitioni non esset, quōd muta Idola, & hominum manibus constructa simulacra hostiarum oblationibus colerentur a plurimis; nefaria quędam impietas, & impia crudelitas Romanorum Imperatorum animos ita occupauit, ita illorum pectoribus insecidit; vt nec ipsi verum Deum venerarentur, nec impune esse permetterent, quōd a Christi famulis coleretur. Adorabant eius temporis homines numerosam illam gentilitię superstitionis Deorum seriem: illis arę ponebātur: illis augustissima templa erigebant: illis sacrificiorum busta fumabant. At vero religiosissima Christi tepla direpta, spoliata, diruta, solo æquata; Christiani, aut in exilium pulsi, aut occisi, aut obscurissimo carcere inclusi nullam horam agebant a dolo reuacuum, nullam a metu solutam, nullam a fletu liberam: Et siquid increpuerat, Christianorum capitibus timebatur. Angustiabantur, affligebantur, vexabantur, tormentis, & laboribus conficiebantur, ad mortem rapiebantur; & quid illis dabatur crimini? quōd verū, viuūq; Deum coluissent. Quis nunc illius temporis calamitates, quis Christianorum funera, luctus, lacrymas oratione descripsit? delineauerit? adumbrarit? Decem non interceptis Imperatoribus Christicolas plagis, variisque tormentis insequentibus, oblitterata religione, confusis Diuinis, humanisq; rebus omnibus; nullus erat, cuius ope Christiani in periculis auxilium, in erumnis solatium, in curis alleuamentum inuenirent, nullus cuius acclamatione inter incertos pugne euentus, & immensam tormentorū magnitudinem instructiores redderentur ad pugnam. Dominabatur impietas, insultabat audacia, immanitas triumphabat. Eheu miseram, atque luctuosam illorum temporum conditionem; cum scelerata impietas ditem

se esse putabat Christianorum calamitatibus, locupletē iacturis, & immortalem funeribus. Oh memoriam illius temporis bono cuiq; , sed vobis potissimum, viri Bergomates, acerbissimam; qui ducetorum annorum intercapedine Episcopo, & Pastore caruistis; cum multos ne vobis preessent suppliciorum metus impediuisset; multos qui ad id animum adiecissent, acerrimorum vis cruciatuum, vt id animi deponerent impulisset. In his tantis Christianæ Reip. ruinis, in his cæcis mortalium mentium tenebris, duo hæc, de quibus loquimur, firmissima Christianæ Reip. latera, & duo clarissima totius orbis lumina affulserunt. Quorum alter (siquam habet veritatis speciem diu pensitata Academici Cratylī sententia, Persæpè mores nominibus repræsentari) de materno vtero exiuit vincens, vt uinceret: & quod de tot certaminibus, de tot acerrimis hostibus, de tantis Religionis Christianæ iacturis triumphum acturus esset, Vincentij nomen Deitus illi aptatum est. Alter verò Alexander, quasi *ἀλεξάνδρῳ* est appellatus, quod suis armis, sua ope, suis auxilijs mortalium generi, ac vobis potissimum, viri Bergomates, salutē allaturus, & Christianæ Reip. certissimo præsidio futurus esset: & cuius adminiculo magna Christiani nominis incrementa Christianæ Reip. forent adiungenda. Sed quid attinet eorum virtutes, atque egregia opera à nominis inauguratione auspicari? Prodeat in mediū Prudentij D. Alexandri incorruptus, atque integer testis S. Mauritius. Cum enim in Gallia apud Sedunos magna mole seditio excitata fuisset; Diocletianus collegam suum, atque commilitonem Maximianum ad sedandos Galliæ tumultus destinauerat: quare habito vniuersa Romani Imperij dictione, delectu: nobilissima Thebæorum vrbs, atq; ea tempestate religiosissima, bellicosissimorum militum legionem conscripsit: Mauritium virum fortissimum, in rebus bellicis strenuum; sed in Christianæ quoque militiæ disciplina imprimis eruditum; virtute nobilem, sed in Deum fide nobilissimum, Ducem vniuersæ legionis instituit; atque magno apparatu instructam legionem Romam transmittit. D. autem Mauritius animo prospiciens, eque sibi contra Diocletianum pro Christi fide, ac pro Diocletiano contra Amandum, & Aelianum certamen fore suscipiendum; huius, quo de loquimur, Alexandri virtutem ad primi Signiferi munus in celebri illa legione traduxit. Nouerat planè, totam belli summam in primi Signiferi prudentia, atque constantia sitam esse: nouerat has partes D. Alexandro, nulli alij aprius committi posse; ea erat D. Alexandri in re militari peritia, corporis proceritas, animi fortitudo, & omnibus in rebus prouidentia. In hoc munere obeundo nulli tormentorū strepitus exanimare, nullum hostium murmur perterrere, nullus armorū fragor, nulli tumultus viri huius Prudentiam concutere, aut commouere poterunt. Cæterum quisquis B. Vincentij summam Prudentiam vocat in dubium, hic Diuinam prouidentiam sub iudice constituat, necesse est. Siquidē cum omnipotentis Dei Prouidentia Valerio Episcopo pastorem Cæsaraugustanæ Ecclesiæ sollicitudinem commisisset: Valerius cupiens ouile sibi creditum à rapacium luporum insultibus sacrum testū conservare; in magna periculorum tempestate; cum maximè in Christianos Datiani impietas longè, lateq; debaccharetur; cum suis ipse viribus satis non fideret, D. Vincentium leuitam adhuc, atque Diaconū in suū collegam asciuit, spē propè certā habens fore, vt is animi firmitate, ac robore, mentis consilio, & singulari pru-

den-



dentia omnes tēpestatum procellas: & suis Vigilijs, suis excubijs à Domini  
 grege omnia pericula depulsurus esset, & iter Cēsaraugustanos ciues Chris-  
 tiani nominis pacem, & Religionis integritatem confirmaturus. O beatū  
 virum singulari prudentia insignem, qui pastorem dignitatem fugiens, pa-  
 storalis tamen muneris grauissima onera non recusauit. Cēpit hic cum B.  
 Valerius orationi, & contemplationi vacare, illi tam fido ministerio defer-  
 uire, Christianos suo gremio refouere, Cēsaraugustanos ciues ad Christia-  
 norum vnitatem, & cælestium bonorū spem excitare, ita vt immanissimi, ac  
 teterrimi Christiani nominis hostis Daciani furor, & rabies longē plus in B.  
 Vincentium exarserit, quā in Valeriū Episcopū æstuarit. At ille vt impē-  
 dens periculum à cēteris propulsaret, vitæ suæ pericula non formidabat, vt  
 pestem, ac perniciē, quam Christianorum hostes Christianis moliebantur, à  
 Christianorū pectoribus arceret, hostium furorem in sui capitis perniciem  
 conuertebat: & ne Christiani nominis vnitās diuisa, ac laniata iaceret, suū  
 corpus dilaniandum, dilacerandumq; immanissimis hostibus obieciat.  
 Quibus nam maiotibus Prudentiæ argumentis spectatissimā tantotū Mar-  
 tyrum virtutem cupitis illustrari? An non summam in eo Prudentiā omnes  
 confiteantur, qui Diuinæ mentis consilio, primus, post Mauritium Ducē,  
 sacratissimæ Thebætorū legioni præesset? præfuit Alexander. Qui priuatus  
 adhuc leuita vniuersam Cēsaraugustanam Ecclesiam reclusus erat, & fati-  
 scentem Valerij nauim perducturus in portum? rexit Vincentius; perduxit  
 Vincentius, cui tum bellum administrandum, tum sexmillia sexcenti sexa-  
 ginta sex viri validis armis, & validioribus animis instructi permitterentur?  
 Diuo Alexandro permisi sunt. Cui adhuc per ætatem à pastoralī gradu lō-  
 gē absenti pastorale onus committeretur? D. Vincentio commissum est.  
 Qui & Pastoris, & Patris, & Ducis, & Imperatoris partes optimē gereret?  
 gesserunt utrique, quemadmodum paulò mox demonstraturi sumus. Deus  
 Deus ipse, viti ciues, cuius prouidentia in sui dispositione non fallitur, D.  
 Vincentium ex omnibus vnum delegit, qui post Valerium Cēsaraugustanæ  
 Ecclesiæ præficeretur, atque ille ipse D. Alexandrum ex omnibus vnum de-  
 legit, quem, post Mauritium Ducem, Thebætorum legioni præponeret. Hoc  
 si Deus temerē fecit, iure de BB. Martyrum Prudentia dubitaretur; At si  
 summum nefas est, & impium (vt est profectò) cogitare, Deum Christianæ  
 Religionis parū consuluisse; tandem tandē summā in his Martyribus pru-  
 dentiam fateamur. Jam verò illorum temperantiam mirari potius iuuat, q̃  
 oratione persequi. Siue enim temperantia ad carnis illecebras, siue ad di-  
 gnitatum ambitus pertineat; siue q̃ omnes animi affectus componat, & om-  
 nia suis ordinibus distribuat: illustria sunt in his Martyribus exempla tem-  
 perantiæ. Duplex in nostris animis, Patres, natura sita est, *αἰσθητικὴ*; altera, altera  
*νοητικὴ*. altera ad sublime erigit, altera ad imum deprimat; altera nos ad res  
 intelligibiles euehit, altera ad res sensibiles succducit; vna nos sursum tollit  
 ad cælestia, altera nos ad carnis concupiscentias illicit, & ad inferna trudit:  
 illa Academico Timæo circulus eiusdem, hæc circulus diuersi; illa Platonico  
 Phædro melior equus, hæc æquus peior: illa Empedocleis Philosophis  
 concordia, hæc illis Hebræis *תְּהוֹמָה*. hæc *וִיגִי* est appellata. Hinc mul-  
 tiplex in nobis discordia, hinc carnis, & spiritus grauissimæ inimiciæ, hinc  
 genuinus in nobis concupiscentiæ morbus, qui hæreditario quodam iure



in nos mortales omnes dimanauit. His in testinis, ac plusquam ciuilibus bel-  
lis diuexati mortales, obliti se esse Diuinæ naturæ participes, rebus hisce,  
temporarijs se totos addicunt eò usq; , vt obbrutescant. Ab his prælijs, ab  
his hostibus tutissimi Martyres perpetuæ pacis, & securitatis gaudio exul-  
tabant: Affectus ita composuerant, vt edomito corpore, inter carnē, & spi-  
ritum sanctissima pax intercederet. Putares hic cæsa concupiscentia carnis,  
quasi icta porca, inter carnem, & spiritum insolubilia placidissimæ pacis fœ-  
dera inita esse: atque cum se noscerent Diuinæ naturæ confortes, aut certè  
ad illius imaginem se esse formatos, nec se aliter ad suum principiū, & opta-  
tissimum finem reuocare posse, aut se ipsos illi imagini reddere, (quam im-  
pressam nobis à Deo nos nostra culpa fœdè commaculauimus) q̄ Diuinæ bo-  
nitatis imitatione, totos sese ad Diuinæ pulcritudinis intuitum, meditatio-  
nemq; conuerterunt, & ad Diuinam illam bonitatem aspirantes, se à cor-  
porearum voluptatum illecebris, imò veriùs ab omni corporis carnisq; com-  
mercio penitus retrahebant. O Augustissima numina humana carne vesti-  
ta; O purissimi contemplatores, qui in penetralia mentis relegati voluptuo-  
sæ carnis imperus, atque aculeos non sentiebatis: Si ad dignitates animum  
referamus, dedignabantur SS. Martyres terre stria, quin & cælestia contem-  
nebant, vltiramundanam tantùm curiam anhelantes, vt quàm proximè po-  
tuisent, ad Diuinitatem accederent. En Patres. D. Vincentius pastorale mu-  
nus, pastoralia onera, pastorem sollicitudinem, pastorales vigilias, pastora-  
les excubias amplectitur, laborat vt bonus Christi miles assidue, Domini vi-  
neam excolit, Christianæ, atque angelicæ vitæ femina Cæsaraugustanorum  
animis cōmittit, & a Pastoralis tamen dignitate abhorret quam maximè: tan-  
tùm abest, ut aut illam prehenset, aut ambiat. O egregiam animi libertatē:  
cælestibus tantùm deseruiat, ac diuinis honoribus: illas tantùm arbitrari ve-  
ras dignitates, ac veros honores, qui sunt spirituales, æterni, cælestes. Pro his  
honoribus consequendis nullos labores non subibant: sciebant ad magna  
ascendere properantibus non esse circa hæc ima subsistendum: nec tam be-  
ne secum actum esse putat viator, si post laborem, & sudorem montium, &  
collium vertices superarit; quàm illi optimè secum agi reputabāt, si post mil-  
le molestias, cum plurimum sudoris, imò veriùs sanguinis effudissent, ad cæ-  
lum tandem, quò nitebantur, ascendere contigisset. Verùm si temperantiam  
eorum circa carnis insultus explicandam fusciperem; timeo ne Martyrum  
castitati fiat iniuria, qui tam absunt à voluptate carnis, quàm cupiebāt à car-  
ne dissolui. Sed illud reticere, ac dissimulare non possum: eos tunc planè  
carnem suam dilexisse, quando pro Christiani nominis confessione aut car-  
ceres, aut ignem, aut setrum paterentur: verbera, carnis suæ delicias reputan-  
tes; catenas & vincula, pretiosa monilia; cruciatus, & supplicia, corporis cult-  
um; cicatrices, & vulnera, gloriosa corporis ornamenta: carnem suam hic  
castigantes in terris, vt in cælesti Paradiso meliora, atque illustriora gloriæ  
ornamenta consequerentur, gaudentes quòd in eorum ignominia Christi  
gloria manifestaretur. Sed equum iam est, vt quanta fuerit omnibus in re-  
bus eorum æquitas, & iustitia consideretis. Namque si rectè antiqui illi sa-  
pientiæ Patres pronuntiarunt, Tantam esse iustitiæ necessitatem, vt nec illi  
quidem qui scelere, & furto pascuntur, possint sine illa iustitiæ particula vi-  
uere; quantam horum Martyrum curam fuisse existimandum est, vt virtutis  
huius

huius pulcritudinem, atque splendorem sibi compararent? Terrenis Principibus obedientiam, atque tributa: Reip. fidem, ac defensionem: proximo dilectionem: Deo debitum honorem, & deuotionem retribuebant. Ceterum, quoniam temporis angustia longam iustitiæ vestræ, BB. Martyres, commendationem non patitur, patere tantillam hanc tuarum laudum iacturâ Vincenti Sanctissime, dum D. Alexandri (cuius hodie solemnitas colitur) insignē iustitiā fusiùs explicem, qui ad iustitiæ defensionem Diuino quodā consilio natus esse videtur. Cum Maximianus animi feritate, & Romana Idolorum religione iussisset, milites omnes dæmonum aris dare thura, imolare hostias, libare sacrificia, & dæmonum aris hominum ora prosternei: audite quā æquo animo viri sacratissimæ illius Thebæorum legionis, in qua D. Alexander primus Signifer delectus fuerat, suæ iustitiæ rationem profiteantur, quæ sunt Cæsaris Cæsari, & quæ sunt Dei Deo retribuentes. Milites, inquit, tui sumus Cæsar, & ad Romanæ Reip. defensionem arma suscepimus, ad tui custodiam has dexteras armatas gerimus: impigrè nos laboribus, & militiæ periculis offeremus, à te nunquā deficiemus, nec aut proditoris, aut ignauæ formidinis notam subire merebimur. Sed serui tamen sumus Christi. Tibi in militia parere debemus, sed illi debemus cultum: à te stipendia laboris accipimus, ab illo vitæ primordia duximus. Tuis itaque præceptis obtemperare parati sumus, modo auctorem nostrum Deum non negemus; bellicam hanc virtutem pro te libenter impendimus, Remp. tuemur libentissimè; sed Christiani nominis fidem armis præferimus, & in Diuino cultu constantiam, opus arbitramur bellicis laudibus maius. Quid enim prodest expugnare vrbes, gentes corripere, regnis manus iniicere, nisi ista Dominus custodierit? ni diuino præsidio cõstituerint? vbi gentium hæc terrena possessio, sine Diuino nutu sedem stabilem habebit? Quare stat animo ante gladio interire, quàm susceptam Christi fidem violare: Quod si decreueris aut sacrilegijs Christianos polluere, aut decimum quemq; funestæ morti deputare: En Imperator, & tua hæc præcepta, & Romanam Religionem contemnimus, & percussorum gladijs intrepidi ceruices amputandas obijcimus. O iustitiā omnibus seculis commemorabilem: Sed quæ tam innocens, & iusta seruitus est, quæ malignitatis, & crudelitatis dentes vitare possit? Hæc vbi Maximianus audisset, grauius in eos animaduersurus, aduersus decimum quemq; legionis illius, bis functam, capitalemq; sententiam protulit: Quæ vnquam secula talē iustitiā audire? Antiquiores veteris testamenti Patres rerum decimas ceperunt exsoluere: dierum decimas Christus suis Christianis instituit, sed caput decimas primus omnium Alexander persoluit, dum commissæ sibi legionis decimumquemq; Imperatoriæ obrulit feritati. Ad tantum iustitiæ cumulum id solum accedere poterat, vt mortem, quam pro illis saluator subierat, suo redderent Saluatori: Sed id quàm mox. Interim illorum fidei quæ poterit par oratio inueniri? Fide confessi sunt se esse Christianos: fide terribili carcere clausi famis in ediam superarunt: fide B. Vincentius reliquit Augustam: fide exulauit Valentianæ: fide Datianum cõtempnit: fide diuersa flagella, ferreos ungues, candentes virgas, & continuas flammæ fortiter sufferebat. fide B. Alexander Maximiani iussa neglexit: fide à reliquo exercitu, quasi contaminato secessit: fide suos milites de gloriosa mortis occupatione contentendentes,

præ-

præconijs attollit: fide, vt audietis, tormentorum tarditatem substinuit, cæ-  
 teros armaturus, & vt vobis, viri Bergomates, maiora fidei documenta per  
 moras suppliciorum exhiberet: fide vivebat vterq; , siquidem iustus ex fi-  
 de viuit. Sed quid illis fides profuisset, sine illa, quæ virtutibus omnibus vi-  
 tam elargitur, charitate? O singularem B. Alexandri charitatem. Cum Ma-  
 ximiani Imperatoris insania, & fera rabies in angelicam Thebæorum legio-  
 nem defecit, & tandem publico edicto sanxit vniuersam legionem deleri:  
 cum tanta iustorum multitudo non potuit effera am mitigare sauitiam;  
 quando tam scelerose sententię nemo est qui in illa legione relictetur, nemo  
 qui aduersus iniustam satellitum violentiam vliscatur: dum insontes pennis,  
 & cruciatibus acquiescunt: quid nam (Deum testor) præter Charitatem ef-  
 ficere potuit, vt B. hic Alexander Maximiani gladium effugiens tantæ lau-  
 dis consortio careret; Bergomum sese reciperet, Bergomi Christi fidem dis-  
 seminaturus; participem se computans neci sacratissimæ legionis, si nõ cor-  
 poris interiectione, salce consortio dilectionis, retardationem Martyrij spe  
 celestis, & amplioris præmij compensando? Veteranus ille miles nomine  
 Victor, cum ad cõtaminatum cædibus locum peruenisset, vltimo animi af-  
 fectu tam sæpe Christianum se esse cõtestatus est: vt tandem vir sanctus san-  
 ctæ legionis consortium celeri confessione meruerit; cæterisq; Martyri-  
 bus eodem loci, & morte fuerit, & honore coniunctus: Et B. hic Alexander  
 Diuino spiritui admonitus tantæ gloriæ sese abdicauit, tum vt Bergomensiu  
 saluti cõsuleret; tum ne Christianæ legionis signa hostilibus manibus inter-  
 ciperentur: ac tandem vt Maximianus intelligeret, Christianorum corpo-  
 ribus profligatis, ac pro illius iussu plagis, & nece immaniter occisis, Chri-  
 stianæ tamē fidei signa ab omni hostium insultu libera esse, atque tutissima;  
 nulla plagarum, vel ferri posse concidere, omnem denique Imperatoriæ  
 feritatis iniuriam præterire. Bergomum tandem charitatis stimulis vrgen-  
 tibus aduenit, & prædicationi suæ miraculorum adhibens confirmationē,  
 intrepidè Christum annuntians, per breui vos Idolorum militiz nomina da-  
 ruros, in Christi militiam adscribi facit. Et cum vos peccatorum, scelerū, &  
 flagitiorum non tolerabili sarcina oppressos inuenisset, fecit item ut Chri-  
 stus fecerat, cum venit, vt multos filios in gloriam adduceret; Animum in-  
 duxit ad mortem excelso animo subeundam, vt te ò Bergomum suo sangui-  
 ne illustraret: vestras omnes iniquitates in se transtulit, coram tribunalī Di-  
 uinæ iustitiæ pro vobis reum se, nocentemq; constituens. O immensam,  
 & Diuinæ charitati proximam charitatem. Vt piū vobis, ac placabilem Deū  
 redderet, In se tyrannorum iram, & Christi iustitiam concitauit: & vt in vos  
 pius dici posset, parum abfuit, quin in se impius, & immanis dici potuerit.  
 Ac tandem si olim amor patriæ, & Decium, & Curtium, & Codrum mortē  
 pro patria iussit oppetere, multò magis D. Alexander quàm citissimū chari-  
 tatem suam commendabit in vobis, quòd mortuus sit pro vobis. At at B.  
 Martyris Vincentij charitas illustis, atque eximia ipsa per se nullius alienæ  
 prædicationis, aut luminis ope, in omnium mentes incurrit: Nunquā illi B.  
 Valerius Cæsaraugustanam Ecclesiam commisisset, nisi in illo pastorem  
 charitatem multis non dicam inditijs, sed euidentibus experimentis com-  
 pertam, & exploratam habuisset. Pro Cæsaraugustana quoque Ecclesia Da-  
 uiani impietatem redarguit, iussa contempsit, in faciem resistit, domo priua-

tus est, ciuitate eiectus, vestibus spoliatus, carcere clausus, catenis pressus, ex-  
 sus fame, punitus gladio, ambusus igne, sæuissima tandem morte perem-  
 ptus. Ecce quò D. Alexandrum Bergomensium amor, B. Vincenrium Cæs-  
 raugustanæ Ecclesiæ dilectio indefessa perduxit. Quantum verò fuerit illo-  
 rum spei robur, & firmitas: quanta de Deo vero securitas; mox sunt decla-  
 raturi, dum exultantes in Domino, securi quòd eos gratia cælestis expectet,  
 quòd eos Paradisus excipiet, mille cruciatus, innumerum pœnarum nume-  
 rum perpetiuntur, vt cum Christo gaudentes, Martyrij palma laureati con-  
 regnent. Hæc illa sunt arma, spectatissimi Auditores, quorum præsidio om-  
 nia ab illis sunt, & dicta, & facta præclare. Horum armorum apparatu in-  
 structi, micum est, quanta cum animi cōstantia, quanto cum sermonis vigo-  
 re Imperatorum impietati sese objiciant. Hæc sunt quasi cunabula quædam,  
 & elementa fiduciæ illius, quam Martyres in verbis, & operibus suis præfere-  
 bant; & quam ego deinceps sum explicaturus. Atque vtinam ego pari splē-  
 dore, & copia orationis hodierno die possem declarare, quantum illi cēte-  
 ris præstarent hominibus, in eo tum maximè, in quo nos à ceteris animanti-  
 bus natura seiunxit: nimirum, dicendi vi, & facultate. In quo sanè studio  
 vtrique versati erant; alter vt commilitonum animos cieret, & ad belli furo-  
 rem accenderet; alter vt Christianos ciues in fide, & religione facilius conti-  
 neret. In eo quantum assequuti sint laudis, & gloriæ, is planè viderit, qui eo-  
 rum gesta non oscitanter audierit. Cum inuehuntur in vitia, quis incita-  
 tor fertur? cum Imperatoriæ impietati opponuntur, quis acrior? quando  
 cum Tyrannorum perfidia configunt, quis pugnatior? cum tyrannos con-  
 uincunt, quis peruosior? cum ad virtutes hortantur, quis plausibilior? cum  
 Christianorum animos leniunt, quis suauior? cum suos symmaritres con-  
 firmant, & laudant, quis feruidior? quis copiosior? cum Christianam fidē  
 ijs, quibus cum morabantur, persuaderent, quis potentior? In commouen-  
 dis verò, concitandisq; hominum animis, & ad Christianam Religionem  
 adducendis, vel iam olim adductis in eadem confirmandis, tantum virium  
 adepti fuerant, vt, quod Græci, posterum memoriæ de Pericle consignaue-  
 runt, Fulgurare, ac tonare, & (quod homines diuinū esse quiddam arbitra-  
 tur) omnes penè animorum motus, quasi habenis quibusdam regere viderentur:  
 Tantæ virtutis erat flagrantissimum Diuinæ gloriæ, & ardentissimum humanæ  
 salutis desiderium: tantum industriæ, tantum viriū ad pro-  
 ferendos Christianæ ditionis terminos conferebāt. Sed eorum in dicendo  
 fortitudinem, quò plus intueor, plus admiror. Siquidem cum Valerius t pi-  
 scopus blasæ lingue vitio parūm feliciter in concionandi munere versari pos-  
 set, huic malo mederi cupiens, quàm sæpè à Deo quasi alter Moses efflagita-  
 bat? Obsecro Domine non sum eloquens; impeditioris, & tardioris linguæ  
 sum: Mitte quem missurus es. Quare Vincentius Leuites adhibetur, qui  
 vocatur à Deo tanquam disertissimus Aaron, loqueretur ad populum pro  
 Valerio, & effectus ejus: qui Datiani flagitiosum furorem reprehenderet;  
 qui dicendi facultate instructus in audientium mentes, animosq; sese impe-  
 netraret, eosq; commoueret, interui baret, afficereiq; , quousque illi vl-  
 trò in Christianam Religionem conscriberentur. Itaque cum Diocletianus,  
 & Maximianus Romani Imperatores impio iudici Datiano, græco scelere,  
 ac furore composito, Hispaniam administrandam commississent: cepit hic

Christiani sanguinis profundendi cupiditate furens, piorum sanguine potui, in electissima quæq; Christi membra defœuire, atque imprimis sacerdotalement dignitatem impetere: Valerium, & Vincentium exilio primum condemnat, tum eos carceris contumelia afficit: Post aliquot tempora iubet illos educi, atque ore minis, & cruentis imperijs referto truculentissimam illis, & crudelissimam mortem minitatur, nisi gentium monstra, atque portenta voluerint adorare. Cui cum Valerius quieto, & sedato animo responderet: Vincentius (quæ erat illius in sermone fiducia.) Quid, inquit, Pater musitas? cur meticolosa voce respondes? cur fidenti animo huius canis aduersus Dei seruos sacrilegis vocibus oblatratis rabiem non coerces? cur illum impietate ductum, & cõtra veram Religionem clauis vocibus obstrepentem verecundo silentio contemnis, cum nec nostrum silentium, quidq; proficiat ad salutem? Quin tu impie, ac blaspheme iudex illud primo in loco scite debes: his tuis diris, & execrabilibus minis non modò non deterri nos, sed nec moueri quidem. Gaudemus planè in Domino, certi, & securi tantam nobis animi fortitudinem affuturam, quanta suffectura est ad præclarissimam de Christiani nominis hoste victoriam consequendã. Freat hic tuus furor, sæuiat hic tua crudelitas, Mortem licet crudelissimã non pertimescimus. Scimus te à Dæmone cõcitatum tua hæc aduersus nos odia exercere. Non potest efferata dæmonum rabies Christi tantum morte satari; eius quoque membris manus sunt inferendę. Non possumus non esse odio tibi, quem mox ab initio Græcæ superstitionis amor occupauit. Perge & tuam cõtra sancta Christi membra ferocitatem expleto: Nam quò acerbis nos cruciari, & fatigari feceris, eò magis contra omnes insanie, & feritatis tuę turbines stabiles nos, victoresq; reperies. Non potuit Christus à Diabolo vinci; nec poterit Christus in membris suis à Diaboli membris superari. Quid, cum inter longos cruciatus iudex modò durioribus, modò mitioribus alloquijs illum à Christi fide dimouere, & auocare sataget? quoties sua loquendi fiducia Imperatoriam crudelitatem excitauit ad noua semper, & inaudita tormentorum genera excogitanda, vt gloriosam magis sæuissimi Martyrij palmam susciperet? quoties Datiani ministros, à quibus cruciabatur, increpauit? quoties illos redarguit, eorum segnitiam exprobrans, quòd in mandatis Imperatoris exequendis, & in lacero corpore ultimis supplicijs conficiendo segniores se gererent? Ac tandem, si illud illustre virtutis argumentum reputatur, cum hostes hostium virtutem vel inuiti fatentur: iudex Datianus accedat, qui cum scitias non inueniret, quibus B. Martyrem à Christiano proposito dimoueret; inops consilij suos satellites ita consulebat. Quid est, Milites mei, quòd hunc temerè Imperatores nostros aspernantem cohibere non possumus? aliosq; plures non dum illata morte pertetescimus? sed vnus Vincentij linguam continere non possumus. Imperatoriam Maiestatem, leges, & Deorum nostrorum iura contempnit, & tamen quis illius orationis vim, atque potentiã non admiretur? quæ illa non commoueat? quem non incitet? quem non fleat? Quid cupitis præterea? D. Vincentius à Christo, vt vir eloquentissimus in B. Valerij adminiculum est aduocatus. Acquiescite tandem Diuino iudicio, accedente præterea hostium Diuini numinis testimonio: Et magna cum admiratione vim dicendi in B. Alexandro recognoscite. Nam si Egesias Cyrenaicus eo diser.

disertissimus est habitus, quodd sic mortalis huius vitæ miserias repræsentaret, vt eorum miseranda imagine (aliorum verba refero) audiētium pectoribus inferta, multis voluntariæ mortis oppetendæ cupiditatem ingeneraret. Quantum eloquentia valuisse B. Alexandrum arbitrabimur, cuius sermonē nemo ad aures suas non obstatas admisit, qui non cum Alexandro patienter acerbissimas pœnas pro Christo, & expereretur, & expectaret; qui non caduca hæc, & fugacia, ad quæ mortales tantopere inhiant, securus ex alto despiceret; qui non totus ex sempiterni æui, & cælestium bonorum spe, & expectatione penderet. Dic tu huiusce rei testimonium, ò Sylane: quid siles? Huic, lectissimi Auditores, (B. Alexādro post luctuosam sacratissimæ suæ legionis stragem ex impijs Maximiani manibus elapso, Mediolani cognito, & in carcerem coniecto) carceris custodia commissæ est: qui cum per læpè grauissimos B. Alexandri, & Materni Mediolanensis Ecclesiæ Episcopi congressus audisset; idiplum Xanto, & Carpophoro Imperatoris satellitibus enuntiavit. Mox vnà ad Alexandrum omnes se conferunt, & quibus virtutibus ad tantum animi vigorem, atq; constantiam iter sibi aperuerit, percontantur. Hic ille humanæ vitæ mala suis coloribus pingere aggreditur, quàm grauis, quàm acerba, quàm multis difficultatibus, quàm multis curis, & angoribus, atq; innumeris penè incommodis mortalium vita obfessa, & implicita, huc, atque illuc agitetur. Corporis illecebras docuit esse inconstantissimas; mundanis voluptatibus nihil esse fragilius; q̃q̃ apud vulgus nihil expectatur auidius: In veri Dei cognitione sitam esse felicitàtem: in solis virtutibus esse præcipua felicitàtis humanæ præsidia: eas esse veras virtutes, quæ animum redderēt, ab omni dolore, & metu solutum, quæ temporum vetustate non intereant, quæ tecum consenescant. Christiana fide, & spe sequuturæ felicitàtis summam in homine animi magnitudinem gigni: hominem supra humana attolli, & magnos rerum motus, persecutionum turbines, vicerationes quoque, & vulnera securum aspicere: Arietis incursum euertere ciuitates, turrium altitudinem residere, editissimas arces, & rerum æquatam cælo cumulum solo æquare; Christianum tamen animum machinamētā non reperiri, quæ vel agitent, vel moueant. Babilonis muros Alexandrū cognomento Magnum intrasse, Carthaginis, & Numantiæ mœnia Scipiadum manu capta: Capitolium arcemue non semel occupatam; Sed mœnia quæ Christianos viros tuētur, esse inexpugnabilia, ab omni incursum ruta, cuius hostili vestigio clausa, nulli rapinæ, furori, aut gentium potestati patentia. Rationem omnem, omnemq; Christiani hominis cogitationē in Deo conuiescere: in gloriam sibi computare Christianos, si pro nomine Iesu cōtumeliā paterentur, scientes, quodd huius seculi potestates corpus quidem possunt occidere, sed animi vigorem non possunt infringere. Qua opinione ductus si Demosthenes olim Antipatrum fugiens, Archæ pollicenti, vitam se illi seruatutum, si in Antipatri fidem se vellet committere, Malle se, respondit, quàm turpiter viuere, honestè mori: quāta maiore cum toletaria Christiani breuia vitæ momenta despiciant, modò æterna Dei supplicia nō incurrant, & ferent potius quàm Idolis turpiter sacrificare, pro Diuini numinis gloria crudeli genere mortis interiri? Eos tādē sic miris modis ad Christi fidem accendit, vt mox antea vitæ concepta penititudine, falsos Deos detestati, Christo nomen dederint, Baptisma susceperint, Christianos se el-



fe & faterentur, & profiterentur: Alexandrum præterea catenis, quas illi Maximianus iniici iusserat, liberum è carceris squalore, & tenebris emisit, & illi Comum versus proficiscenti sese comites adhibuerint. Miramini fortè, Patres, vim facundie M. Antonij, quam tunc expressit, ubi à Marij, Cinnæq, militibus obruncandus, militum arma, & districtos mucrones sua voce à crudelis imperij ministerio reuocauit? fecit id quoque B. Alexander. Nam cum Maximiani imperio Christiani omnes, qui Mediolani comperti sunt, ad sacrificia, & dæmonum aras admouerètur, atque illicictores strictis ensibus parati essent (ni cōtinuò sacrificassent) in Christianorum capita, & terga sæuire: Quid inquit B. Alexander, ad Christianorum animos infringendos, 10: tores adhibes carnis? si Deos tuos adorari cupis, fides, & cōstātia Christianorum est infirmenda, non carnis infirmitas ad mortem vsque puniēda: cum spiritus vigore, non cum carnis imbecillitate congregiēdum est. Nihil possunt hæc tuz minæ Christianorum animos perturbare. Cur enim Christiani corporeæ mortis violentiam perhorrescant, quorum capita sunt immortalitati destinata? Nihil nos nostro supplicio, nihil pœnarum atrocitate commouemur. Miseret nos exitij vestri, qui tantis errorum tenebris inuoluti, & vestrę dignitatis obliui, Marmoris, & ligni fragmenta adoratis. Eos inuocatis, quorum os, nec uoculam quidem vnam reddere potest: ijs vos prosternitis, quorum oculi nihil cernunt: illis hostias offertis, quorum nares nihil odorant: ab illis auxilium imploratis, quorum manus, & pedes externo tantum impulsu mouentur: in eorum patrocinio spem collocatis qui se non possunt sua ultione defendere: ab illis æternæ vitę præmia expectatis, qui vetustate confenesunt. Magna profectò numina. Mars adulter. Fur Mercurius. Dionysius temulērus. Calua Maroni Venus, & Homero vulnerata. Victi Penates. Hercules Omphalę seruient ad vsq; scandalio committigatum caput. An non Cęsar augurijs, & vestrorum Dædæ oraculis renitentibus ante brumam felicissimè nauigauit? An non Dionysius fano Proserpinę spoliato, ventis secundis per altum vectus est? An non Sylla Apollinis templum impunè pecunijs exhaustit? Quid referam Ionem à Dionysio aureo amiculo exutum, & laneo pallio vestitum? Quid Epidauriū Aesculapium à Dionysio debarbatum? Quid effœtam Iunonem? Resipiscite tandem, & fabulosam horum Deorum vanitatem agnoscite, ne inertissimis istis, & mutis simulacris similes effecti, sempiterno veri Dei consortio careatis. O miram loquendi fiduciam. O singularem animi fortitudinem, quæ tantum abest, vt præsentem Principem, aut paratos cruciatus pertimescat, vt sui quoq; admiratione districtos is, & vibrantes gladios inhibuerit, & cruore vacuos vaginis reddiderit. Ad hæc verò cum animum conuertisset, vt Bergomum profugeret, ubi non nihil profecturum se, esse cernebat: & q̄q̄ exiguus hic esset Christianorum numerus, spes tamen ostendebatur fore, vt Bergomensem Ecclesiam fundaret, fundatam construeret, constructam attolleret, & Christiani nominis splendore illustraret: Vos, viri Bergomates, Diuinam illius vocem, & eloquentiam experti estis; cum ille vestros omnium animos ad Diuinum cultum incenderet, cum docendo, monendo, & cohortando vestrę omnium salutis consuleret. Erat eò temporis hæc Ciuitas vanis superstitionibus imbuta, Idolorum cultui addicta, nihil æquè ac Christianā fidem animo auersabatur, mente, & cogitatione à Christianorum institutis,

quàm

quàm longissimè abhorrebat: nullus sempiternam gloriam spectabat: ipsèdem  
finibus omnes & hoc vitæ curriculum, & suas cogitationes circumscribe-  
bant: nullus hic veri Dei cultus, nulla sanctitas, nulla religio. O miserandam  
Ciuitatis huius conditionem. Hanc teterrimam, & obicuriissimam Bergo-  
mensis populi noctem D. Alexander misetatus, cepit aduocato magno homi-  
num ceteru illustrare, tam densas errorum tenebras disijcere, religionis errore  
labantes sua oratione ad veritatis lumen reuocare, superstitionibus extrusis  
veram religionem inferere, confractis Idolis crucem amplectendam erigere,  
& in Bergomatum pectoribus mundanarum cupiditatum ardore restincto,  
Diuini Spiritus ignem accendere, & eos in spem, & desiderium sempiternæ  
felicitatis ad ducere. Quàm sepe magna, & clara voce clamabat: Resipiscite  
tandem, viri Bergomenes, & si quod sensus vestigium in vestris pectoribus  
adhuc superstes est, intelligite in Idolorum simulacris nullam posse esse Diui-  
nitatem. Resipiscite, & mentis oculos ad Deum rerum omnium fabricatorem  
conuertite, ne dum æternos (vt falsò remini) Deos colitis, in verè æterni Dei,  
ac districti iudicis ira, & sempiternæ mortis sententiam incurrat. O vim  
orationis omnibus seculis memorabilem, quæ sic Bergomensium animos in-  
flammauit, vt factò agmine pariter oēs ad danda Christo nomina concurre-  
rent, & salutaribus aquis cupidissimè immergerentur, vt Christianorum  
participes computarentur, Christianorum catalogo adscripti, & consignati.  
O hic vñdum spectaculum. Eò tandem Bergomatum Ecclesiam suis miracu-  
lis, & prædicatione perduxit, vt qui modò vrbem errorum caligine obsecra-  
tam viderant; nunc muratis rebus, vrbem florentem religione viderent: &  
qui vanæ spei fluctuatione continenter agitabantur; iam in Christianæ reli-  
gionis studijs conquiescerent: & qui modò nullam vitæ esse putabant, dem-  
ptis corporis voluptatibus; nunc ad Ecclesiæ finem confugerent, suas volu-  
ptates deploraturi: & qui modò mortem quasi omnium terribilium nouissi-  
mum exhorrebant, nunc in meritum grunnarum finem, & felicissimæ vitæ  
auspicia arbitrantur, & ad omnes hostiles ictus intrepidi, acerbissimam  
mortem, opportunitatem abolendi peccatorum sordes existimarent. Hanc  
tantam Metamorphosim, tantam rerum mutationem B. Marijris oratio fe-  
cit: Hæc mutatio dextere excelsi. Equidè etsi nihil adderem, sat tñ illustris  
D. Alexandri facundia ex his perspicitur. Verùm tria hæc, quæ sequuntur,  
argumenta dilucidè magis, quantùm B. Alexandri oratio valuerit, declara-  
bunt. Cum D. Alexander è vinculis, & carcere, quibus Mediolani comprime-  
batur, à Xanto, & Carpophoro ereptus, & illis comitantibus ad Comensem  
agrum iter pergeret, & iam Como non longè abessent; Ecce defunctus, qui  
amplissimis exequijs, & magna atratorum caterua efferebatur, non sine gra-  
uissimo oium interuenientium merore, lucuq;: ac tantò magis acerbissimus  
omnium dolor ingrauescebat, quantò spes ois demortui vita perierat. Sed  
ò mirabilem Dei potentiam in Sanctis suis. B. Alexander ratus, tam opportu-  
na occasione, si quod publicè miraculum ederetur, non mediocrem Chri-  
stianæ fidei accessionem esse faciendam; genibus flexis, sublati in cælum ma-  
nibus, diuina ope quesita, ce rram demortui exsuscitationem aio concipiens  
(ò miram tanti viri orationis potentiam) vna vocula extinctum h: iem parò-  
tibus incolumen reddidit. O immensam orationis potentiam, quæ vel vno  
verbo mortis vincula frangit, ad vsq; Tartara penetrat, animum ab inferis



reuocat, mutis imperat elementis; vt mox quæ cadaueris speciem gererēt, ratiocinantis animæ motu circumacta, dicto citius in vera hominis mēbra mutarentur. Quantam putamus admirationem illorum animis obortam esse, qui tantam virtutem perspexerant? quantam illius qui reuixerat? Non minus illustre est, quod sequitur, argumentum. Cum vos, viri ciues, magnis periculis fluctibus vrgeremini, & iam Raymondus Cardona Bergomensium hostis infestissimus vestros fines peruasisset; iam vrbe obsissa; iam parte muri qualisata, & crebris atietum ictibus discicet, in vrbe signa illaturus; iam vrbe militum voluntati deprædandam permissurus esset; miserrimè vobiscum actum erat, & iam oīum spes deplorata, & salus desperata erat, nisi sancti Alexandri oratio lapidas Bergomensium res subleuasset. Itaque Raymondo noctu arctissimo somno correpto, altitit B. Alexander dormienti; atque illi protestatur fore, vt gladio, quo erat armatus transfusus concideret, nisi placabilis Bergomatum legatos excipiat; iunctoq; sedere, & illæsis Bergomensium rebus, militum copias ex Bergomenſi agro subduceret. En quantum hæc B. Alexandri verba valere: Postero die nihil Raymondo fuit antiquius, quàm vt data Bergomensibus pace, & amico ingressu vrbe inuisens templum S. Alexandri visitaret, atque illius sacratissimū corpus pio cultu veneraretur. Quare quod hæc vrbs ardore flammæ non conflagraret, magnæ militum copię non potuerunt efficere; efficit oratio gloriosissimi Martyris. Ne solo æquaretur, vestra consilia prohibere nō poterant; B. Alexander sua oratione phibuit. Hostium, furorem nulla vestri Senatus auctoritas comprimere potuisset; B. Alexander sua oratione compressit. Minaces, & atrocissimas pœnas, quas Raymondo eratis persoluturi, nulla vis propulsare potuisset; B. Alexander sua oratione propulsauit. O incorporabilem tanti viri potentiam, qui plus uno uerbo potuit, quàm mille militum acies potuissent. Addite uerò his, consignatum esse veterum monumentis, Lupum auribus capi non posse; & hic tamen Lupum auribus cepit, cum lenissima; & placidissima oratione Bergomi Christū annuntians, Lupum Crotatij filium, & Bergomenſiū Ducem, non nihil inflexit ad Christi fidem. Qui cum Christianorum constantiam videret, ad horum se numerum appulit, reputans non sine numine fieri, vt inuicta patientia viri Christiani aspera omnia parerentur. O B. Alexander, debent tibi omnium Sanctorum Bergomatum confessiones, & martyria; debent Xantus, & Carpophorus, & Fidelis sua pretiosa martyria, quib; tu & salutem, & fortitudinem implorasti, & quos tibi fecisti filios gloriosi laboris: debet tibi demum totus penè populus Bergomas, qui Lupum Ducem, & cœteros Magistros, quos tu in fide, & religione instruxeras, sequuti sunt. Hęc est summa uis eloquentię, hęc uera sermonis constantia. Turbantur Imperatores; at BB. Martyres alacres operi insistant. Edicunt, ut fileant; illi clamāt, Deo magis, q̃ hominibus obediendum. Adduntur minæ; illi non deterrentur: traduntur in carcerem, uinculis constringuntur; sed uerbum Dei non alligatur: cędunt flagris; & agunt gratias. Denique sanctissimum Iesu nomen nunquā desistit annuntiare, donec pretiosa morte Deum glorificent. Quare, ut Christum non tantum præconio vocis, sed & passionis testimonio ab eis prædicatum intelligatis, armet se duritia pectus necesse est, dum cęteras meę pollicitationis partes exsoluo, dum iratę crudelitatis truculenta facta narratur.

Si-

Siquidem vêtum est iam mihi ad eam partem, in qua induratum cruenti tor-  
toris sequitiam, feri iudicis iram, insanam torquentis rabiem, atrocissimas pœ-  
nas, seuissima supplicia, acerbissimas plagas, grauissima vulnera, crudelissi-  
mas neces mens, & animus perhorrescunt; & ipsa mediussidius lingua refu-  
git ad tantam crudelitatem referendam ministerium accomodare. Sed dis-  
soluenda es tandem lingua: quamobrem, vt ab immanibus spectaculis aius q̃  
citissimè auerratur, tor, tâtarumq; persequutionū pelagus emēsurā; tot, tâ-  
tisq; horribus acta, alas induc, vt promptior, & velocior Euro tam sēua  
tormenta percurras. Ac primū, dum sēua, atq; probrosa Datiani mens no-  
ua in B. Vincētiū tormentorū machinamenta excogitat, inuictam B. Mar-  
tyris Alexandri patientiam intueamur. Cum Maximianus doloris impoten-  
tia, & irē imperio totam pulcerrimam illam Thebæorum legionem persisterē,  
li sententia deleri constituisset, & illi in Christiana adhuc pietate persisterēt,  
& intrepidi validissimos ferientium ictus fortissimè sustinerent; B. Alexā-  
der cepit Diuino instinctu cogitare: Qui statim patitur, & vna confessione  
Deum glorificat, in se tantū, idq; semel, coronari: At qui pugnam diū, & se-  
pius gerunt, semper de huius seculi sollicitudinibus triumphantes; hos to-  
ties coronari, toties vincere, quoties cum hoste configunt: horum quidem  
vnā esse coronam, sed multiplici victoriæ multiplici præmio gloriosā:  
hos sui Martyrij retardatione ampliores mercedes in cælestibus sedibus sibi  
preparare, confratres suos ad pretiosa martyria prouocare: & tot esse habi-  
turos incrementa meritorum, quot suo exemplo, & sua doctrina Martyres  
fecerint. Hæc vbi Alexander Christiana mente reuolueret, Diuino ductu,  
se è media Thebæorum legionis clade subtraxit, & Mediolanum profugit.  
At quo secessu Maximiani tyrannidem fugerit? vbi gentium B. Martyr suā  
innocentiam procul ab Imperatoris ira, & furore poterit collocare? quem  
in locum erat abiturus, quod carnificina Cæsaris rabies non peruaderet? Co-  
gnitus est Mediolani B. Alexander, ac subito comprehensus in teterrimum  
carcerem truditur, in vincula conijcitur, compedum duritie coercetur,  
minis adhibitis, & crudelissimæ mortis expectatione. Quis animum in tan-  
tis periculis non despondeat? quis non cogitatione perturbetur? sed for-  
tissimus athleta Christi squalorem, pedoremq; carceris, vinculorū atrocissi-  
mos nexus, compedū præterea crassitudinē mirā alacritate tolerabat: nul-  
lum supplicij genus horrebat: non truci cuiusquā vultu cōmouebatur, nec  
minaci, & terribili voce à Christiano proposito diuellebatur; gratulabūsus,  
quod spiritum, quem Christo debebat, Christo redditurus esset, & ad Dñi  
complexum, & oscula peruenturus. Tormenta illa sunt, & grauissimæ pœ-  
næ (quis diffiteatur?) sed ijs tamen, qui viuunt in carne: verū hic gloriosissi-  
mus Martyr compedibus corpore præmebatur; cogitatione cælestem pa-  
radisum perambulabat: vinculis corporis astringebatur; sed animus ad æter-  
nam libertatem euehebatur: corpus carcere continetur; sed mens in cælesti  
gloria residebat. Non poterant cémentinij parietes illius animum sua angus-  
tia continere, cuius conuersatio in cælis erat: pedes infamibus compedum  
vinculis ligati erant; sed per infamiam interim, & bonam famam ad Paradisi  
gloriam gradiebantur: carceris situ, & forde nitidissimum Martyris corpus  
polluitur; sed interim spiritus Diuinæ gratiæ balneis lotus, candidior in dies  
efficitur: In obscurissimis carceris claustris demorabatur; sed hæc mora ad  
am.

ampliores gloriæ titulos proficiebat. Verùm hæc sunt pretiosi martyrij, & gloriosæ confessionis initia, non consummatio. Sanè paucos post dies Imperator B. Martyrem carcere productum sibi sisti iubet; atq; illi edicit fore, vt vel Idola prostratus adoret, vel innumeris verberibus ictus ex hac vita cõcederet. Cui cum B. Alexander constantissimo vultu respondisset; Summâ suæ orationis esse, vt Maximianus oẽm spem expugnandi, aut flectendi constantissimũ in Christi fide aĩum sibi p̃sunderet; Maximianus iræ impotẽtia furẽs clamat, Alexandrũ esse tollendum, qui temerẽ, & Imperatoriam maiestatem, & Romanã religionem contempserit: illius nece Deorum offensam esse piadãdam, vt Imperatoriam maiestatem pariter, & Deos suos vindicaret. Iraque iram suam nefariẽ satiaturus, B. Alexã. nobilissimum corpus ignobili sũuitia afflictauit. Namq; crudelissimi ministri Imperatoris iussu B. Alexandrũ, qui præsens, & audiens vultu tñ eodem Christianæ religionis causam tuebatur, diutissimẽ verberibus ceciderunt. Crudele spectaculum. Nobilissimi ciuis corpus verberẽ liuidum. Carnem cruore respersam. Ossa cõtusa. O inuidam crudelitatem. Romana religione, & iure iurãdo vetiti erant Romani, nequẽ Romanum ciuem fustibus cederent; siquidẽ, vt præclare à Tullio scriptum est, Facinus olim erat, Romanum ciuem vincere, scelus verberare, propẽ paricidium necare: & hic tñ facinorosus, & scelestissimus Romanorum Imperator, Thebẽi, ac nobilissimi ciuis diutissimẽ victi per acerbissimas plagas, per atrocissima verbera quærebat internecionem. Romanus ciuis non erat (fateor); sed erat vbis Thebææ ciuis, quæ Romanum Imperium sua fide, suis armis defendebat. Romanus ciuis non erat (non inficior); sed ne ciuis vinciat, ciuitas obrinebit; innocentia non obtinebit. Ceterũ B. Martyr, nec iniuriarum, nec verberum acerbitate à sacro Dei cultu potuit absterri. Quãpropter Maximianus ira commotus, cum nihil ui, aut metu promouere potuisset, adhibet ministros, qui hanc illi offerat cõditionẽ: vt si immolare noluerit, saltẽ dissimulãs tacitus, dũ sacra loui fierẽt, interesset. At B. Alexander, quasi alter Eleazarus, nefariã conditionem, & impium munus recusauit, & Deum cogitans iudicem, qui falli non potest, nefas esse duxit, vel silentio Dei legem prodere, vel Imperatoriæ beneuolentiæ, & breuis temporis vitæ desiderio, Dei offensionem incurtere sempiternã. Stato nihilominus die Maximianus parat, quæcumq; sacrificijs sunt necessãria: illuc Alexandrum adduci, & satellites vibrãtib⁹ gladijs imperat ad moueri, vt si sacrificia B. Martyr aspernetur, nihil districtos mucrones prohiberet, quin continuo Alexãdrum transfigerent, obruncarentq;. Huc adductus B. Alexander zelo Dauidis incensus æstuat, exat de taio, atq; imitatus illum, qui factò sibi de resticulis flagello e Dei templo ementes, & videntes eiecerat, Diuini spiritus impetu, præsentẽ Maximiano, terribili violẽtia in apparatum irrumpit, illum q; consputat, manibus prostermit, pedibus obterit, limo cõtaminat, calce disiecit. Ac celebri loco, populo circumstante, Magistratibus audientibus, & inspectantibus, Idola, & simulacra cõculcat, aram destruit, & clara voce, & Imperatorem, & illius Deos confundens, vnum verum Deum colendum, orandum, venerandumq; pronuntiat. O miram, & oĩbus seculis prædicandã aĩ fortitudinem. Vnus homo, peregrinus, captiuus, in media gentium multitudine Deorum simulacra confringit; priuatus homo Imperatoriam præsentiam non verecetur. O Magne Macedonum Rex Alexander; qui incurioso illi,

illi, atq; feriant Alexandro dixisti: Aut Alexandro digna opera facito, aut Alexandri nomē deponito: huc si re & tempora, & fortuna derulissent, egregia hæc Alexandri Martyris facta spectaturum; nō dubito, quin mutata voce, mutato consilio, ad hunc nostrum Martyrem exclamasses: Aut digna te ò Alexander opera faciam, aut Alexandri nomen deponam. O factum bene, O spectaculum pulcherrimum; non hoibus modo sublime, sed & Angelis iucundum, & Dei oculis acceptissimum. Hic ira, & odium turbulentissimos in Maximiani pectore fluctus excitauit: incandescit aīo Imperator, & truculēta facie, & voce terribili satellites vrget, qui grauissimas ex Alexandro pēnas expeterēt. Excruciat B. Martyr, flagellis vapulat; & inter verbera, & tormēta, inter durissimos corporis dolores, vulnere super vulnera renouato, parum abfuit, quin fidem aīam inconcussa fide decorā, spiritali vigore illustrem, constantiam, & deuotione ornatam, hostiam Deo purissimam, & acceptissimum offerret sacrificium. Verūm satellites vitæ illius pepercere, q̄ (vr Maximiano retulerunt) in B. Martyris vultu species quædā humana præstantior, & augustior eluceret; quæ inspectantibus non nihil religionis offerret. Hinc Maximianus dum Martyri dolorem parat inferre, ipse amatæ sollicitudinis tormento cruciatur, & iam confusus hæret. Sanctum Martyrem videt suis cruciatibus superstitē: quas vltra pēnas adhibeat, prorsus ignorat. Ecquis iam non putet, confusa canina rabie, satiatam esse huius vulturis famem? Nondum est satiata. Rursus D. Martyrem detestanda carceris contumelia fœdat; rursus in vinculis ligat, vt eum spiritum, quem Idola colendo seruare contempsit, turpiter in catenis consumeret, quasi ligato corpore, spiritus quoque terrenis nexibus vinciat. Carceris infamiae inedia adiungitur, & omnium rerum inopia. Norunt, qui experti sunt, quantæ sint famis angustiae: nouerat illas Isaac filius maior, qui famis impotentia, primogenita vendidit. Sed quid Martyri deesse poruit, cui Christus non defuit, qui solus illi sufficiebat? An lectus, in quo quiesceret? sed habebat Christi sinum, in quo iaceret. An panis, quo nutrireitur? sed non in solo pane viuunt homo. An vestis, qua operiretur? sed iam olim Christū induerat. An sociorum solatium? sed Angelorū illi consortiū non deerat. An dies, & solis radij? sed celesti luce, & eius, qui diē fecit, & solem, clarissimo splendore nox & dies æqua luce splendebant. O vberriam, & abundantem inopiā, quæ nihil hēret, & nihil illi deest: quæ nihil habet, & oīa possidet. Ceterū B. Martyr animaduertens, Bergomensium salutē periclitari, ni illis ante sui Martyrij diem consuluerit, nō mediocriter torquebatur. Sanē S. Martyris in duorum affectuū meditullio positi præcordia hinc Martyrij auditas, hinc Bergomensium amor trahebant. Nam & infinito ardore Martyrij tenebatur, & Bergomates ad Christi fidem conuerrere cupiebat. Vicit tandem amor salutis Bergomensium. Quare opportuna occasione ē vinculis, & carcere se se eripiens Bergomum aduenit; atq; arbitratus non procul abesse diē, quo de terris, & pēnis ad Christi promissa perueniat, de cælestis gloriæ adeptione cum reliquis Sanctis gratulaturus, nulla sit mora: Bergomi fidem Christi diffeminat: multos in Christiana religione instruit: nulli labori parcit: huc, atque illuc discurret: in vestram salutem impendit noctesq; diesq;. Vix, imò ne vix quidem, duodeuigesima lux Bergomensium mentibus affulserat (nam ante B. Alexandri aduentum in urbem Bergomum, ducentis annis perpetua

errorum nocte detinebantur) Maximianus recognita, mox lictores Bergomum aduolare iubet, qui Alexandrum turpissima morte mulcarent. Illis itaque Bergomum ingredientibus, Alexander Martyrij audius vltro se obuium fecit; atque nuntiantibus, Imperatorem iussisse, Alexandrum Thebæum ciuem, & religione Christianum gladio animaduerti, Alexander comprehensus, & arctissimis vinculis implicatus ante Crotati statuam sistitur, aut Dijs gentium sacrificaturus, aut capitis obtruncatione plectendus. Alexander suæ passionis tempus instare cognoscens, flexis poplitibus, cum immortales Deo gratias retulisset, qui ex perniciosissimæ carnis inuolucris ad præmia illum sempiterna vocaret; deniq; vt Bergomatibus insigne dilectionis suæ monumentum relinqueret, Deū obtestatus est; vt quæ Bergomi fidei germina plantata erant, & nuper in horto Dominico confitas plantas cælesti rore benediceret, & copiosissimis sancti Spiritus imbribus fecundaret. O piæ. Viri precationem. O immensam, & vigilem pastoralis officij curam, quæ nec in ipso quidem vitæ suæ excessu, obliuisci sui potuit. Vix hæc dixerat, cum caput per diuissimorum satellitum furori obiecit, & seipsum contumelijs, & licetorum ludibrijs exposuit. Satiare iam effusa crudelitas, & piorum sanguine exhausto inebriare. En caput securi obiectum: quid furis? quid fremis? quid cogitas? quid moliris? quò te iracundiæ stimuli præcipitabunt? Parata est (viri ciues) funesta persecutorum manus, sperans ictu capere, B. Martyris mentem à Christiano proposito diuellendam; sed emollitur ferri durities, inspecta Martyris patientia. Audet tyrannica manus B. Martyris cervicem percutere, sed non audet ferrum tam impium, & crudele vulnus inferre. Tentat cæca persecutis ira caput à membris auellere; sed ferto nescio quid religionis obijcitur. Horret ferrum in innocentem Martyrem scire; & illi non horrent in Dei famulû cruentas manus inferre. Ferox profecto hoium genus, qd famulo sui conditoris audet vitam adimere, nec ducit nefas infontium cruore sedem maculari. Euicit tandem violenta crudelitas: erumpit satellitum Maximiani sacrilegus furor, qui dum te, D. Alexander, hominû numero, hoiumq; conspectui subtrahere incitatissimo in Christum odio adnuntuntur, te Diuorum concilio adiecerunt. Siquidè securi percussus ad Deû aduolasti, Deo offerens terrena tormenta, pro illis Diuina præmia recepturus; mortem illatam offerens cælesti immortalitate præmiandam; euictum mundum, cui præmium esset Paradisus; vitam temporalem, cui merces exhiberetur æterna vita O foelicem aiam, quæ mundo priuata ab Angelis excipitur, in cælestibus sedibus reponenda. Quare depositis doloris vestibus, candidam hinc iucunditatis, & exultationis vestem indueris, nisi hanc meam animi pacem interturbarent B. Martyris Vincentij sæua tormenta. Adeste paucis (benignissimi ac religiosissimi Auditores) spectaturi estis inuictam Martyris animam contra barbaram feritatem, & contra acerbissimos imbecillæ carnis dolores fortissimè confligentem. Atq; vitam sic mihi summa facundia, & æquum temporis spatium datum esset, vt ego optarem in singulis tormentorum generibus B. Vincentij incredibilem constantiam, & recedere, & vocis præconio exornare. Nunc verò tēporis angustia cogor, multa subindicare potius, quàm enarrare; & meam orationem ad illarum tabularum exemplar effingere, quæ cum innumerorū hoium concursum repræsentet, plurius tñ totum penè corpus abscondunt. Quare non dicā fusiùs, quàm

viriliter gloriosissimus Martyr maleolenti carcere, catenis, & ferreis quibusdam ponderibus afflictus, fame, & rerum omnium inopia pessimè acceptus, a<sup>7</sup> spera omnia subtraheret; affluentia Diuinarum deliciarum omnia dura deliniret; & spe futuræ beatitudinis grauius omnia teleuaret. De illius exilio illud modò præterire non possum: & fortunatissimam fuisse Valentiam, cui Tyrannus Martyri nociturus tantum præstint dignitatis, ut iam non terreni, sed celestis ciuis dici ciuitas mereretur: & ineptam fuisse Datiani malignitatem, qui se sanctum virum putaret in exilium pellere posse. Siquidem, o Datiane, si exilium queris quo caro plectatur, frustra laboras: nam ubique Martyres in carne sunt exules, ubique in hac quasi mundana scena spectatores. Si spiritui exilium indicis; nusquam est exul Martyris spiritus, qui semper in Christo conquiescit, cui Christus ad usque seculi consummationem præsentiam suam pollicitus est. Ad illa iam festino, quæ inexplebilis feritatis indicia sunt. Iudex itaque Datianus infestus, immò in Datiano Antichristus expressus, ut suam crudelitatem truculentissimo supplicij genere exercerent, videntes B. Martyrem Christum planè referentem, cuius etiam demorui memoriam capitali odio prosequébatur, renouant in B. Vincentio tormentorum machinas, quas Christi corpori dilaniando adhibuerant. Hominem Dei de ligno suspendunt, ac suspensum excruciat, excruciatum dilacerant; ut dum Martyr dilaniatur in ligno, Christum iterum persequantur in cruce. Ferum, atque atrox spectaculum. Membra omnia discerpuntur: cutis detrahitur: caro abscinditur: ossa contunduntur: totum corpus sanguine spargitur; sed frangi tamen non potest S. Viri còstancia. Cur enim ad ligni cruciatus expaueat is, cuius est spes omnis in ligno? In ligno pro nobis pretium Christus persoluit, & in ligno salutis suæ sacramentum Christi seruus agnoscens, partem pretij Christo resoluit. Ecquid proficis stulticia crudelitas? Infamibus supplicijs putas te Christi seruum afficere, & triumphum illi parare gloriosissimum. De ligno pendet, quia de ligno redemptus ad vitam æternam, de ligno profecturus erat in gloriam: Corpus eleuatur à terra, ut terræ contagione non polluat: In ligno suspenditur, ut ad sublimiora tendat: Membrorum mole minuitur, ut in celum expeditior euahatur. Idcirco exultabat vir sanctus de tanta crudelitate, & sequenti iudicii gratias agens horrabatur, ne tormenta decrederent; ne tanti Martyrij gloria minueretur. Hic vidisses Datianum truculenta facie, anhelanti pectore, violento spiritu, tumido collo, voce terribili, ore spumante, præ nimia animi concitatione verba cruore, ac minis mixta euometem; & quod post tot tormenta fortissimus athleta in Christi còfessione permaneret, plus seipsum animo discruciantem, quam Christi Martyris corpus affligentem; & (cum furenti rabie insaniret) lignis, ac virgis carnifices verberantem; quod à Martyris parietibus victi in Martyre cruciando torperent. Quam magna sunt iudicia Dei. Non adhuc obierat Martyr, & qui penas illi, & cruciatus præparabat, ultor se illi præstitit contra tortores. Insurgunt carnifices, ut in Martyrem sæuiant; inflargit Datianus in Martyris ultionem, & in carnifices sæuit. Ad ille patienter omnia tolerat, & sua tolerantia vesanam iudicis mentem conturbat: quæ cum non possit de Martyris virtute triumphare, & se comperiat esse contemptam, exacerbatur magis, & ad æuiora supplicia excogitanda prouocatur. Tandem recordatur memorosa crudelitas. Dominum Crucifixum: & nequid deesset, quod crudeliter excogitari potuisset, lignum, de quo B. Vincentium suspen-



derat, in Crucis formam componi iubet, atq; illi Martyrē suffigi. Id cū audisset Vincentius, ait. Terribilis sit hæc sententia ijs, quorum thesaurus in terris est: Christianorū nihil interest, humi'ne, an sublimis moriantur. Quanta tunc aſo lætitiā Martyrem concepiſſe putandum eſt; cui contigit Chriſti vexillum recenti cruore perfundere, & cōfeſſionem ſuam Crucis ſigillo cōſignare? Quā libenter Crucis refrigerium, atq; ſolatium amplectebatur? quā illi dulce erat in ligno conqueſcere? quā gratū illi fuiſſet, ſi vltima illic ſuæ vitæ hora diluxiſſet? ſed Crucis lignum Chriſti cruore emollitū, q̄ olim durum fuerat in Chriſtū, tam nunc eſt in Martyres mite. Igitur cū nec in Cruce vltimū Vincētij ſupplicii inueniſſent, deponitur; nec vix à vinculis ſolutus celeriter ad Crucē accurrit, illic amplexus, illic oſcula figit, illic tortores increpat, quod iudicis imperia non exequantur. Adhibētur noua tormenta, multiplicantur longa ſupplicia, vulnera renouantur; nec tanta ſeritas expletur. Imò veriūſ priorē adhuc pēna vibrāte, alia deinceps exurgit. Dadianus etenim internis facibus furoris accenſus, faces, & flammas extrinſecus B. Vincentio curat admouendas. Nec mora: ligna incēduntur, incenſa Martyri ſupponuntur: & nequa pars corporis, ignis incendia deuitaret, accenſi carbonēs in teſtibus partibus admouetur, & ferreæ virgæ igniuntur in Martyris pectus coniiciendæ, vt candētib; virgis viſcera cremarentur. Verūm probauit cor eius flamma, non vſur; atq; adeo dū torretur, lætiſſimo habitu oris canebat: Probaſti Domine cor meum, & viſitaſti, igne me examinaſti: Preiunt me tormēta, non opprimunt; oppugnor à Dariano, nō expugnor. O admirabilē, & vix credibilē Martyris patientiā Hæc cū audiſſet Dadianus, cæco furore efferueſcit; & tantis flāmis illius pectus ardebat, vt pēnoſo irati cordis incendio penē occubuerit. Reſpiſiſcē, reſpiſcē tandē, Dadiane. Si te im̄ iracūdiæ flamma diuexat; quid tibi faciet gehennæ flamma? ſi in tēporario igne nullam animi trāquillitatē inuenis; quid in æterno? ſi nunc dū Martyrem iudicas, tam grauiā tormenta ſentis; putas te impunē laturū, cū à Martyre iudicaberis? Sed iracēntis fumus ad alta ſemper erigitur. Superbia ē m̄ eorū, qui Deum oderunt, aſcendit ſemper. Poſt miſerū exilium, poſt tetrum carcerē, poſt arctiſſimā vincula, poſt grauiā pondera, poſt ponderoſos compedes, poſt longam inediā, poſt ſedū ſqualorē, poſt ſæua flagella, poſt corporis ſuſpenſionē, poſt carnis dilacerationē, poſt crucifixionem, poſt mēbrorū abſciſſionem, poſt diuturnum ignis ſupplicium, poſt vigues ferreos, poſt candētes virgas, poſt accenſos carbonēs; quis putet noua, & exquisitiōra ſuper eſſe tormenta? quis nō putet, ſi noua flagella adhibeātur, in Dei ſeruo cruciari non membra; ſed vulnera? quid putet plura terribiſſima huius mōſtri decreta poſſe commemorari? En reperit atrociora tormēta ingenioſa crudelitas; & quē lucis huius aura per atrociſſimas pēnas priuare nō poterat, decreuit ſempiterna quadam nocte punire. Audite q̄ grauē pēnam. Tenebroſus locus exigitur, & fractis teſtibus vtrinq; acutiſſimis ſternitur. Illic Martyris corpus cōſtitui, atq; ab Imperatorijs miniſtris diutiſſimē volutari iubetur: quos ſæpē videas ſanctiſſimum B. Martyris corpus ad extremū penē ſpiritum redactū, truculentis ſagellis lacerū nō modò volutare; ſed et ſup acutas teſtas ex alto præcipitare. Sed quid illi teſtæ nocuiſſent, cuius virtus aſuerat plus, quā teſtæ? Poſt plurima ſupplicia, perpetuis tenebris addicitor, carcerē vndiq; clauditur, uectibus cōmunitur; nequa humani conſortij cōſo-

lacione recreetur. Cōterūm, quid est luci inaccessibili inaccessum? quid viæ inuium? quid angelicis mentibus clausum? Repentē Deus Beatorū spiritū cohortē ad sanctū uirū destinauit, qui clausum carcerē reseraret, inaccessa peruaderent, hoibus in uia suis gressibus calcarent, obscuras, ac nubilosissimas tenebras admirando, ac nouo lumine illustrarent, & suū cōciū ē languoribus tantisper eriperent. O præclarū Martyrē: Quāto eū amictū lumine, quāta gloria illustrē in cēlestibus regnis triumphare putamus, qui in tantis tenebris, tanta Diuini numinis luce perfruebatur? Quid nūc facies, Datiane? an nō te uictum agnoscis? cede tandē tuis ignibus, cede tuis tormētis: quæ (dum illis Martyris uirtus inuicta nō cedit) muta quadā uoce te admonent: Cur nos torquēdis Martyribus adhibes, qui ob illius Dei cōfessionem patiuntur, quē nos ubiq; fatemur, quē nos terra, mariq; prædicamus, quē nos ubiq; benedicimus, quē oīa laudant, cui oīs spūs attestatur, cui nos paremus ad nutū, & uocata adsumus? Præter illius uolūtātē nec moueri quidem possumus, cuius uoluntate creata sumus. Si præter Dei uoluntatem uis Martyrem diuexari, prius, si potes, aliquid quod Deus nō creatit, inuenias. Quiesce tandem; & cū Vincētū nō possis uincere, patere ab illo uinci. Euidē est tua scuitia, euincatur iam tua malitia, euincatur impietas; & quibus nexibus tam arctē B. Vincentiū ligasti, uincito tuā perfidiā. Tuas manus funestas illi dato, contra quē nihil persequētū manus infestæ ualuerūt. Religiosissimum B. Martyris spiritū tēporaria morte uexasti; proscinde iā tuam crudelitātē, ne perpetuo intetitu iusta exsoluas piacula. Desine Martyrē torquere; ne dum illum caduca huius fragilis uitæ fēlicitate priuas, solidā, & æternam fēlicitatē amittas. Tu illi tēporarios cruciatus influxisti; tu illius mēbra temporario ardore concremasti; tu illius mēbra contriuiisti: ut quid moraris? festina: tuum cor conter: tibi ipsi tēporarias pœnas inflige: urere ab illo igne, quē Christus in suorū Martyrū pectoribus accendit: ne in æternū conteraris, ne in æternū puniaris, ne sempiternis flammis concremeris. Quiescit tandē Datianus, non quod desit ipse tormētis, sed quia defunt illi tormenta: & non tā pietate, quā ut iterum pœnæ renouentur, S. Martyris spiritum prorogare studet. Strato in ligneo componi iubentur amba, ac dilacerata Martyris membra. Illic B. Martyr, qui per lignū redēptus erat, & per lignum suæ cōfessionis primordia Christo cōsecrauerat, per lignum quoque, tunc cū minime oīum Datianus existimasset, sese tormentis eripuit sempiternā in Christo requiē adeptus: & qui pro pace adipiscenda tam diū cum hoste pugnat, nullis aliis usus armorū generibus, præter lignum, in ligno quoque; quæritā requiē inuenit, & strato in ligneo moriens, in ligno positus scruientis inimici conatus elusit. Quis non putaret hunc esse finē scruēdī? nec dū tñ satiata est carnificina persequētium rabies, & in quē uiuū antea scruierat, in eundē mortuū quoque; defecit. Quid agis amarus uitæ pariter, & mortis tortor, Datiane? lubes B. Martyris corpus in campū proijci, & feris cōsumēdū permitti, ut sepultura careret is, qui cōsepultus in Chō, exciderat sibi sepulcrū ī Petra? En corui atra, ac pulla veste illius sacratio corpori insidentes exequias tumulando persoluunt: ecquis se temperet à lacrymis? & cum cotui maximē oīum aiantium, cadauerum pastu delectentur; gloriosi tñ Martyris cadaueri pepercerunt, atque illud à feris, & volucribus illæsum custodiuerē. Incōstans tñ adhuc mihi est, feras ne plus abegerit cor-



coruorum impetus, an Martyris aspectus; coruorum vis, an quædā religio. Verum notate, Patres, induratā tortoris rabiē. Quem feris religio est attingere, quē Datianus in terris nec vincere pōt, nec cōsumere, hunc vtro ex bovis pelle confecto inclusum, & magna illi mole alligata in mare abijci iussit; vtiā terro facinore terrā, ignē, atq; æthera polluerat, sic nunc aquæ elemētū violaturus. Sed vt Vincentius, cuius nomen ex ipso omine quæsītū fuerat, vbiq; uictor euaderet; quē Datianus nec in igne, nec in aere, nec in terra p̄detē potuit; aquæ ēt agnouerunt uictorem: Dedit. n. Dñs seruo suo in mari viā, & iter fluctus semitā fortissimā; & Martyris corpus, qđ Datianus aquarū fluctibus agitātū, & profundissimo tandē pelago conditū nūq̄ gentium apparere cupiebat, summa cura custodiuit, & ad litus remisit. O stultā hoīum sēuitiā. Quid, Datiane, extinctū corpus, & inanime cadauer persequeris? quid illud humanis aspectibus eripis? si nihil his cineribus religionis inest, nihil potestatis, exangue corpus cur te sollicitat? Quodd si sanctissimi Martyris corpus, quasi insit illi non modicū virtutis, & religionis, reformidas, Resipisce iā. B. Martyris corpus feris deuorandum exposuisti, auius dilacerandum, piscibus consumendū: vin nunc Martyris fortitudinem, & sanctitatem agnoscere? Interroga iumenta, & docebunt te; volatilia celi, & indicabunt tibi. In aere suspensum, in igne concrematū, in terra feris expositum, maris fluctibus iactatū, vbi deinceps Martyrem torquebis? En te uicit Vincētius. Vicit in aere, vicit in igne, vicit in terris, uicit in aquis. Viuum Martyrē torquebas, mortuum persequeris; iā Vincentius te vicit uiuus, uicit & mortuus. Sæuissimi iudices, iniqui tortores, uinxistis Martyres a Martyribus uicti: Martyrum corpus dilaniastis, & vestrū aiū dilacerastis. Horret mens tantæ crudelitatis admiratione, & ad sanctissimos Martyres cōuertitur? Felicissimi, & fortissimi Martyres saxo duriores, ferro firmiores, adamāte fortiores, auro incorruptibiliores, quo uos laudū præconio exornē? quo metri genere prædicem? qui quasi incudes passionibus firmabamini, quibus p̄peti infinita supplicia erat regnū, erat uita. Quibus p̄ne oēs, atq; ipsarū p̄narū ultima mors ludus erat: quos Deus in columnā ferreā, & murū cneū dedit, dās uobis faciē, ut adamantē, & silicē: quorū fortitudo, fortitudo lapidū, & quorū caro, caro cneā. Qui enim fieri potuisset, ut tam excelsō aio inter tot supplicia Dei serui perseuerarent immobiles, nisi fortitudo lapidū esset fortitudo eorū? percutiebantur, uulnerabantur, cedebantur, & inter uerbera (quia caro ænea caro eorum) Dei laudes alacriter resonabant. Quorum aīas perpetua iucunditatis stola vestitas Deus coronat in celis, & cadauera tamē non deferit in terris. Siquidē Diuina Prouidentia, B. Vincentij corpus inter maris fluctus agitātū, Christianorū oris applicuit, & mox sese dedit in apertū, humanis aspectibus conspiciendū, religiosissimo cultu tumulandū, venerandūq; solemnibus cērimonijs. Vos quoq; D. Alexandri felices, & sanctissimi cineres non penitendū sortiti estis habitaculū; quos pro Bergomeni salutē Bergomi speciosissimē collapsos, tantis hodierno die honoribus, & quantū n. nobis Dñs donare dignatur, magnificis vocibus, laudibusq; psequimur. Verum et si mēs hoc loco, vel ad Tyrānorū scelestā facinora iurissimā, & libera indignatione proscindenda, vel ad Martyrū sanctitatē extollēdā oī impetu feratur: melius tū silētij freno reuocabitur; qm̄ sanctis Martyribus celi tuū numero adscriptis paria reddi nō possunt in terris; ad hæc autē mon-

monstra sugillanda, vt merentur, quæ nã oratio nõ est inualida? quis iabus, quæ procella verborũ par tantæ crudelitati poterit inueniri? Prudentius agã, si ad vos conuertat, Viri ciues, qui & B. Vincentij patrociniũ nõ semel experti estis, & quorũ vrbs effecta est B. Alexandri cinerũ, q̃ vllius alterius triũphorũ, & nobilior, & illustrior monumento. Siquidẽ nõ pauca sunt nec obscura, quæ hãc vrbẽ celeberrimã reddunt, & illius nomen, & gloriã per oēs nationes disseminarunt: nõ inficior. Amplissimũ sanẽ Dei donũ est, & auspiciatissimũ clarissimæ Venetorũ Reip. auctoritate regi, consilio gubernari, prudẽtia mnniri, iuuari suffragijs, & augeri dignitate. In cuius sinu, atq; potentia, tanq̃ in tutissimo portu, subditæ illi ciuitates securæ conquiescũt: q̃ sola Imperij diuturnitate libertatis icolumitatẽ cõsequuta, sola Italicę libertatis pfugium, & arx munitissima dici põt: rã experts amarissimæ feruituris, vt eadẽ illi fuerit Imperij diuturnitas, & libertatis. Quãtũ verò decoris huic ciuitati adijciunt vigilantis. & Reuerendis. Pastoris Hier. Ragazzoni nobilissimũ genus, perennes excubiæ, & summa oĩbus in rebus prudẽtia? cuius ductu pulcerrimæ huius, atq; fortunatissimę vi bis gubernacula paribus habens religionis, & iustitiæ diriguntur. Transferte iã oculos ad hos Clariss. Patres, & vrbis istius lumina fulgentissima, Andræam Guffonum, & Paulũ Lauredanũ, quos Venetorũ Resp. huic im̃ rei destinauit, vt vniuersũ ciuitatis corpus tueantur, sintq; illi cõtra exterarũ gentiũ impetus uallum firmissimũ. Maximum præterea decus, & ornamentũ in uiris, quos oĩ virtutiũ genere præditos hæc Ciuitas procreauit, positũ esse, non abnuo. Fuit semp hãc Vrbs quasi feracissimũ seminariũ electissimorũ hoĩum, q̃ bello clari, rerũ à se gestarum admiratione vniuersam Italiã compleuerunt. Tot viros ingenij dotibus celeberrimos peperit, quot intra suũ sinũ cõtinerere nõ potuit. Horũ aliquot nostra Vallimbrosana Religio in sui gloriam aluit, è quibus si ceteros ob tẽporis angustias sileo; Dñm Firmianum tũ Io. Pauli Medolachi filiũ, & præceptorẽ meũ eruditissimũ sine ingrati animi suspitione reticere non possum: cuius ea est ingenij perspicacitas, Doctrinæ, & eruditionis profunditas, vt vel ipse vnus p se obscurũ quantumlibet Viculũ nobilitare, & illustrare posset. Quo sit, vt vix, imò ne vix quidẽ dijudices, plures ne Doctores, an plures Ductores conceperit, ediderit, aluerit. Magna sunt hæc Dei dona profectò, atq; nescio an dicã maxima. Sed quantò illustrius es ò Bergomum B. Alexandri cineribus, quãtò B. Vincentij securius patrociniò? Quòd si hos Patres iustissima quidẽ, sed tanta im̃, & tam grãdi veneratione prosequeris; quæ, & quanta decet te in horũ amplissimorũ Chri Martyrum solemnitate persolvere? Si religiosissima Smirnæ Ecclesia sanctissimos Polycarpi cineres tanto cẽrimoniarum apparatu collegit, & Viennensis Ecclesia immenso auri, atq; argenti pondo suorũ Martyrum cineres, quasi pretiosissimã mercem redimebat; si Athanasius Antoniũ in Antonij amiculo veneratur; si aureus ille iucunditatis, & eloquentię fons, & sanctitatis viuum exemplar Io. Chrysostomus, interno quodã ai m̃ore conficiebatur, quòd tũ corporis infirmitate, tũ Pastoralis cura prohibitus, Romã aduolare non posset, vt felicissimis illis catenis oscula figeret, quæ olim Paulum Apostolum arcũtissimo nexu vincebant: Quibus, quæso vos, pietatis officijs, quibus honoribus sanctissimum B. Alexandri corpus venerari debetis? Maturate iam oēs, Viri ciues, adite B. Martyris reliquias. Nec vos deterreat, quòd iam olim hoies mortuę

carnis attactu contaminarentur. Nunc. n. (vt præclare scripsit D. Basilius) pretioſæ ſunt Sanctorum reliquæ: nunc qui Martyris oſſa contingit, quandam ſanctificationis gratiam aſſumit. Agite viri ciues. Nazianzenus Gregorius grauiter conquerebatur, q̃ abſentis Baſilij oſſa pro mentis ſuæ voto reuereri, atq; adorare non poſſet: vos itidem doleat, quòd ſacros B. Vincenij huius Vrbiſ patroni cineres iuſta honoris veneratione proſequi non poſſitis. Et ſi in Magni Alexandri nomine tantũ felicitis ominis poſitum eſſe vana gentiũ ſuperſtitio ſibi perſuaſit; vt ex Alexandri militibus animi gratia inter ſe præliantibus, ij victoria potirentur, quorum Duci Alexandri nomen obtigerat: quos nam Mundi, aut Sathanæ impetus non propulſabitis; quæ bella aduerſus ſpirituales nequitias non cõficietis feliciffimè; quæ Dei furorẽ obgrauia noſtra ſcelera concitatum non expugnabitis; quæ tandem vota offeritis irrita: ſi hoſtium inſultibus B. Alexandri nomen, ſi Diuini furori pias B. Alexandri preces obieceritis; ſi veſtra vota dulciſſimo Alexandri nomine, & interpellatione condieris? Itaq; viri Bergomates, huius veſtri Patroni patrociniũ implorate: cineres eius veneremini, qui ne hæc Ciuitas in cineres collabere-tur, ſua oratione prohibuit. Caput illud honoretis, quod pro veſtri capitis ſalute hoſtium furori obiectum eſt. Ad ſacros cineres, & ſacrum caput incenſum, & aromata adolete, quod, vt Chriſto bonus odor eſſetis in omni loco, carceris ſqualore, atq; fetore penè contabuit. Illius exangues reliquias adorate, qui Ciuitatis huius incẽdium. ſuis lacrymis, & paratas vniuerſo populo gehennæ flammas, ſui ſanguinis effuſione reſtinxit. Ad ſacratiffimum corpus B. Alexandri, qui vos ad Euangelij lucem perduxit, & ad venerandam B. Vincentij aram pialumina accendite; quibus in obſcuriſſimo carcere pro veſtra, & omnium Chriſtianorum ſalute ſacrentibus, Diuina claritudo radi-uit. Ad eorum laudes decantandas præconium veſtræ vocis accommodate, qui ſumma efficacia, & omni ancipiti gladio penetrabilioris ſermonis eloquentia vos ad placidiſſimum Sanctæ Matris Eccleſiæ gremium reuocauerunt. Immortales illis gratias agite, qui pretio ſuæ mortis, adimplentes ea, quæ deſunt paſſionum Chriſti pro illius Eccleſia, vobis emerunt immortalitatem. Vincite veſtris amplexibus ſanctiſſimorum Martyrum pedes, qui pro vobis olim feliciter vincti, vos quoq; in die remunerationis ad cœleſtia regna glorioſo itinere pertrahant. Ad ſacraſiſſimum B. Martyris Alexandri corpus accurrite; atq; illic genibus flexis, proſtrato corpore, collacrymantibus oculis, ſupplicibus palmis, præ latria, & ſpirituali dulcedine in voces laudis, & gratiarum actionis erumpite. Date ſepulcro dulces amplexus, & aris oſcula ſuauiſſima.

Ego quidem, Beatiffimi Martyres, ſi non corpore, at certè ſpiritu veſtris genibus aduolutus, veſtras aras, veſtraq; templa, & ſanctiſſimas reliquias veneratus, ſupplex oro: ut propitio, & fauente numine florentiſſimam hæc Urbem, & Ciuium incolumitatem tueri, opratis ſucceſſibus, & felicitiffimis incrementis Bergomenſium nomen augere; & quam immortalis Dei nutu, & horum Patrum conſilio pacem habent, in longiſſimum æuum feliciter cõſeruare velitis: & ut tandem Ampliſſimorum Præſulum, Spectatiſſimorum Patrum conſeſſum, & nobiliſſimos Ciues ſub veſtro præſidio, atque tutela deliteſcentes ad cœleſtium præmiorum faſtigia euehat, perpetua illic vobiscum felicitate fruituros.

Dixi.

B

Usc. 1174. 5

99 862253

1146.15





